

Gobernador a pidi un rapport di evaluacion di KIA



ORANJESTAD (AAN): Korectie Instituut Aruba (KIA) pa hopi tempo tabata trata di haya un miho maneho pa asina evita cu droga y obhetonan skerpi drenta KIA. Sinembargo e situacion ainda ta asina.

Fred Wijnberg di Management Detensie en Veleigheid cu actualmente tin encargo di KIA ta duna di conoce cu regularmente nan ta controla e celnan.

Actualmente KIA tin un cachu cu por detecta droga y tambe celular. Segun Wijnberg den pasado tabata drenta hopi mas droga awor cu e control hunto cu e cachu loke cu ta wordo haya ta hopi mas menos cu antes. E controlnan ta mas amplio unda cu pafo di KIA ta wordo controla door di e K-9, tambe e tereno paden ta wordo controla prome cu e cel nan wordo habri mainta pa e presonan sali.

Segun Wijnberg na momento cu e controlnan aki a cuminsa loke cu a wordo descubri ta cu tin personanan cu ta bin y tira un bala y ta resulta cu den e bala tin droga den dje, e bala ta keda riba e tereno e presonan ta wordò laga liber pa nan bay tuma aire fresco y na unda cu nan ta haya e bala y nan ta hiba esaki den nan cel.

Cu e controlnan aki tanto paden y pafo cu ta sosode constantemente pa e droga por drenta KIA no ta facil mas. Tambe e personal di KIA prome cu nan drenta paden nan ta wordo controla door di e personal di CEA

y despues nan ta wordo controla door di un otro grupo apart y despues nan por drenta pa asina nan por cuminsa cu nan trabao.

Controlnan na KIA seraper tabata tin, pero e maneho di control actualmente a cambia y na unda cu a trece un resultado positivo pero ainda tin obhetonan skerpi ta drenta aunke cu e ta hopi mas menos cu antes. E deseo di Wijnberg ta pa por logra tin e situacion aki bao di control unda cu no ta drenta nada ilegal den KIA, sinembargo e no ta posibel na ningun prison rond mundo. KIA ta haciendo su esfuerzo mas cu ta posibel pa asina baha e cantidad di obhetonan ilegal cu ta drenta KIA. Fred Wijnberg ta aclarea cu KIA no a wordo controla door di e comision CPT pero e rapport cu nan a haya ta

un rapport cu a wordo pidi door di Gobernador pa asina Gobernador tin un bista di e situacion den KIA.

E rapport yama (Rapport betref de implementatie en uitvoering te nemen verbeteringen na bezoek CPT van Nederlandse Antillen en Aruba in juni 2007) y e rapport a wordo traha door di Prof. mr. P.C Vegter y mr. G Pesselse.

Sinembargo Wijnberg ta kere cu fin di otro aña si nan lo haya bishita di CPT pa asina controla y evalua e situacion di KIA. E evaluacion di e rapport cu Gobernador di Aruba a pidi no a sali positivo unda cu e conclusion final ta cu tin diferente asunto cu mester a wordo mehora ainda. Un di e asuntonan aki ta cu tur siman tabata tin violencia ta tuma lugar entre e detenidonan.

Wijnberg a splica cu e

aña aki tabata tin solamente dos biaha cu presonan a bringa contra otro y cu esey ta muestra cu e medidanan tuma a duna su fruto. Violencia verbal ta sigui si, pero actualmente Wijnberg ta hopi satisfecho cu e hecho cu violencia unda cu cuchio etc ta wordo uza contra otro a bira hopi menos.

Un otro aspecto cu tin atencion ta e hecho cu KIA su edificio ta hopi vulnerable, mirando cu KIA ta hopi bieu e beton entre otro no ta di bon calidad mas, unda cu tin scheur horizontal y vertical den muraya. Awor ta cambiando algun di e palonan di luz, pasobra na diferente ocasion esakinan ta cay abao. Tur esaki ta pone cu lugar di trabao pa e empleadonan ta deprimente.

Segun Wijnberg ora cu bo ta den KIA bo ta wak 'schimmel' riba muraya,

solamente hero rond di bo y ora cu e wardadornan di preso wak den e pasiyo-nan unico cos cu nan ta wak ta pia en bez di por wak bon den e celnan. Sinembargo awor a pone camera nobo y e situacion ta mihor, pero si e medio ambiente di trabao ta malo caba y bo ta traha eyan 24 ora pa dia, 7 dia pa siman, ta hopi remarcable si bo por keda traha 10 of 20 aña na KIA. "Ami no sa si ami lo kier esey", segun Wijnberg. E situacion ta hopi malo, pero ta costa hopi placa pa drecha esaki, el a sigui bisa. Wijnberg a indica cu e ta compronde cu hendenan ta mas interesa den construi un hospital nobo of renoba esun cu tin, drecha schoolnan etc., pero tardi of trempa mester mehora e estado di KIA. Tur e puntonan aki ta hinca den e rapport cu gobernador ta na altura di dje tambe.